



VERSCHNUUFFER

www.verschnuuffer.ch

Fasnacht 2013

Sujet: Bisch sicher?

Si iberrollt ys z nacht und kalt,
die Wälle vo der raue Gwalt.
Drum fliege z Basel wider d Fätze,
und das ganz wertlig, nit bim Schwätze!

Ins Gryzfyyr kunnt drum d Schuggerey,
wo seeleruig - trotz luttem Gschrey -
im Spiegelhof deeskaliert
und Radarkäschte usprobiert.

Dr Darwin het s als Erschts begryffe,
wohär dr scharfi Wind het pfyffe:
En Angschthaas, het s uf Ärde schwäär
zum Frischflaischfuetter wurd äär.

Hyt gseet me das doch eender gsittet:
S het d Gmainschaft offiziell committed
es liig ihr Schutz und Wohl am Häärz
vo jeedem ainzel - dasch kai Schäärz!

Het friener aim d Natur bedroot
gseet hyt der Noochber amme root.
Hesch friener als no frindlig griesst
bisch hytte froo, wenn kaine schiesst.

Am Wuchenänd gheert s schyynts derzue,
dass nimm kasch ussgoo, ganz in Rue.
No ai, zwai Gleesli ka s bassiere,
dass Di mit Gfotz muesch duelliere.

Git s blau Flägge isch es gritzt.
Solang Dir kain der Buuch ufschlitzt
kasch froo sy kunnsch eso dervoo,
hän si nur s Gäld und s Händy gnoo.

Vyyl ärger sin no d Fraue draa:
Was däne Schlimms bassiere ka
muesch in der BaZ am Määntig lääse
voor Gruus duet`s aim als fascht verbääse!

Im Wallis wärde d Schiess-Ständ gschlosse,
s wird ainewääg grad wyter gschosse.
Es sin jetzt d Zyyt e bitz divärs
und d Situation isch schlicht pervärs!

Vyyl krasser sin no d USA,
wo jeede darf e Waffe ha.
Si dien im Kindsgi Bluet vergiesse
und nämme s wertlig, s Knaabeschiesse!

Entwaffne ka me d Lyt schyynts nit,
well s kaini klare Gränze git:
Was isch e Waffe, was isch kaini?
Wär bruucht e Hufte, wäm längt aini?

Bim ainte isch sy Waffe s Muul,
der ander findet dryyschloo cool,
der Dritt, dä bruucht fir Gwalt sy Kopf,
der Viert griegt`s ab, dä armi Dropf.

Du Skinhead Baschi gryff scharf duure
und stopft däm Pagg jetzt ändlig d Schnuure!
Nur d SP-Soland, das dumm Ei,
isch dusse sicherer als dehai...

Dr Kessler isch schyynts Spezialischt
fir Sicherhait und sunsch so Mischd.
S sorgt d SVP, die Schlangebruet,
uf alli Syte fyr bees Bluet...

Die brav Bevölggerig am Ryy,
die kunnt in goldig Keefig dryy.
Do ka si wiider zfriide lache,
well mir im Freye Oornig mache!

D Verschnuuffer Staff fyr Sicherhait
isch jeederzyt grad kampfbereit!
Mir mache nit lang Fääderlääse
und gryffe grad zem groobe Bääse.

Drum geen mir nur „en bloc“ uff d Strooss
und zien uff alli Gsichter loos,
wo-n-ys e bitz bedroolig schyyne,
die zien mir präventiv grad ynel!

Wenn mir voruss spaziere geen,
sin mir bewaffnet bis an d Zeen.
So zaige mir au ganz symbolisch,
wie s ys do z Basel schaurig wool isch!

Au unseri Latärne kaasch vom Määntig z`Nacht bis am
Mittwoch am Morge uff em Minschterplatz bestune.

Bisch e Kind, mechtsch Fasnacht mache,
denn git`s kaini halbe Sache!
So schrib denn unseri Obfrau aa
und mäld Di gschwind zem Yyschtoo aa.

Yneluege: Samschtig 09.03.2013 14.00-16.00 Uhr im Käller
an dr Malzgasse 9 in Basel

Mir fraie uns uf DI!

Fir Informatione mäldsch Di bi dr Obfrau:
Salomé Hug-Meier, Verschnuuffer Gnepf, Malzgasse 9,
4052 Basel, email: gnepf@verschnuuffer.ch